

四庫全書

史部

欽定四庫全書

史部

明史卷五十九

六十九

內閣中書臣瞿照覆勛

總校官編修臣朱鈺

欽定四庫全書

明史卷五十九

大學士張廷玉等奉 敕修

志第三十五

禮十三

禮一

皇后陵寢

與宗帝后陵寢

睿宗帝后陵寢

皇妃等喪葬

皇太子及妃喪葬

諸王及妃公主喪葬

皇后陵寢洪武十五年皇后馬氏崩禮部引宋制為請於是命在京文武官及聽除官人給布一匹令自製服皆斬衰二十七日而除服素服百日凡在京官越三日素服至右順門外具喪服入臨畢素服行奉慰禮三日而止武官五品以上文官三品以上命婦亦於第四日素服至乾清宮入臨用麻布蓋頭麻布衫裙鞋去首飾脂粉其外官服制與京官同聞訃日於公廳成服命婦服亦與在京命婦同皆三日而除軍民男女素服三日禁屠宰在京

四十九日在外三日停音樂祭祀百日嫁娶官停百日軍
民一月將發引告太廟遣官祭金水橋午門等神及鍾山
之神帝親祭於几筵百官喪服詣朝陽門外奉辭是日安
厝皇堂皇太子奠元鑪玉璧行奉辭禮神主還宮百官素
服迎於朝陽門外仍行奉慰禮帝復以醴饌祭於几筵殿
自再虞至九虞皆如之遣官告謝鍾山之神卒哭以神主
詣廟行祔享禮喪滿百日帝輟朝祭几筵殿致欽不拜東
宮以下殿帛爵百官素服行奉慰禮東宮親王妃主以牲

醴祭孝陵公侯等從命婦詣几筵殿祭奠自後凡節序及
忌日東宮親王祭几筵及陵小祥輟朝三日禁在京音樂
屠宰設醮於靈谷寺朝天宮各三日帝奉皇太子以下詣
几筵殿祭百官素服詣宮門進香訖詣後右門奉慰外命
婦詣几筵殿進香皇太子親王熟布練官九袞皇孫七袞
皆去首飾負版辟領哀見帝及百官則素服烏紗帽烏犀
帶妃主以下熟布蓋頭去腰經宗室駙馬練官去首經內
尚衣尚冠以所釋服於几筵殿前丙位焚之皇太子親王

復詣陵行禮大祥奉安神主於奉先殿於期齋戒告廟
百官陪祀畢行奉慰禮成祖皇后徐氏崩次日輟朝
不鳴鐘鼓帝素服御西角門百官素服詣思善門外哭
臨畢行奉慰禮三日成服哭臨如上儀自次日為始各
就公署齋宿二十七日止文武四品以上命婦成服日
為始詣思善門內哭臨三日聽選辦事官俱喪服人材
監生吏典僧道坊廂耆老各素服自成服日始赴應天
府舉哀三日餘悉遵高后時儀又定諸王公主等服制

世子郡王皆齊哀不杖期世子郡王妃郡主皆大功周
楚諸王及寧國諸公主及郡王之子皆小功遣中官訃
告諸王府造祔謁太廟祭器謚冊寶悉用檀香將用冊
帝躬告天地於奉天殿丹陛上御華蓋殿鴻臚寺官引
頒冊寶官入行禮傳制曰永樂五年十月十四日冊謚
大行皇后命卿行禮四拜畢序班舉冊寶案至奉天殿
丹陛上置綵輿中由中道出入右順門至几筵殿以冊
寶置案退俟於殿外尚儀女官詣香案前跪進曰皇帝

遣某官冊謚大行皇后謹告贊宣冊女官捧冊宣於几筵之右置冊於案宣寶如之上儀奏禮畢女官以冊寶案置几筵之左內官出報禮畢頌冊寶官復命百日禮部請御正門視朝鳴鐘鼓百官易淺淡色服帝以梓宮未葬不允至周期帝素服詣几筵致祭百官西角門奉慰輟朝三日在京停音樂禁屠宰七日禮部官於天禧寺朝天官齋醮其明日帝吉服御奉天門視朝鳴鐘鼓朔望朝見慶賀如常儀几筵祭祀熟布練官及發引齋

三日遣官以奠其告郊廟社稷帝素服祭告几筵皇太子以下哀服行禮遣官祭所過橋門及沿途祀典諸神百官及命婦俱素服以次路祭梓官至江濱百官奉辭於江濱皇太子送渡江漢王護行途中朝夕哭奠官民迎祭者皆素服既奠賜護送官軍及舁梓官軍士鈔米有差正統中仁宗皇后張氏崩禮部定大行太皇太后喪禮皇后成服三日後即聽政祀典皆勿廢諸王以下內外各官及命婦哭臨如前儀哀服二十七日而除軍

民男女素服十三日諸王勿會葬外官勿進香臣民勿
禁音樂嫁娶及葬遣官告太廟帝親奉太后衣冠謁列
祖帝后及仁宗神位及奉宣宗衣冠謁太后神位其禮
視時享天順中宣宗皇后孫氏崩儀如故事止改哭臨
於清寧門英宗皇后錢氏崩禮如舊惟屠宰止禁七日
外國使臣免哭臨正德元年景帝后汪氏薨禮部會羣
臣言宜如皇后妃例輟朝三日祭九壇太后中親王以
下文武大臣命婦皆有祭制可憲宗廢后吳氏正德四

年薨以大學士李東陽等言禮如英宗惠妃故事憲宗
皇后王氏正德十三年崩越三日帝至自宣府乃發喪
百官具素服於清寧宮門外聽宣遺誥及發引先期結
平臺與順天府文衢相值帝晨出北安門迎皇太后及
皇后御平臺候殯復入至清寧宮親奉梓宮朝祖百官
步送德勝門外惟送喪官駢送明日帝奉神主還京百
官迎於德勝門帝素服腰經御西角門百官奉慰卒哭
始釋服孝宗母紀氏憲宗妃也成化中薨輟朝如故事

自初喪及葬帝及皇太后中宮妃主皇子皆致祭遣皇子奉祝冊行禮塋域葬儀俱從厚皇親百官及命婦送葬設祭皆如儀世宗祖母卽氏嘉靖元年崩服除部臣毛澄等請卽吉視事議再上命考肅孝太皇太后喪禮澄等言孝肅崩時距葬期不遠故暫持凶服以待山陵事竣與今不同况當正旦朝元亦不宜編衣臨見萬國若孝思未忘第毋御中門及不鳴鐘鼓足矣從之仍免朔望日陞殿既葬四日帝御奉天門百官行奉慰禮始

從吉嘉靖中孝宗皇后張氏崩禮臣以舊制上帝謂郊社不宜瀆罷祭告又謂躬行諸禮前已諭代亦罷謁廟禮及太常寺以朝祖祔廟請各廟捧主官詔主俱不必出蓋從殺也先是武宗皇后夏氏崩禮部上儀注有素冠素服經帶舉哀及羣臣奉慰禮帝曰朕於皇兄后無服矧上奉兩宮又迫聖母壽旦忍用純素服青服視事諸儀再擬於是尚書夏言等言莊肅皇后喪禮在臣民無容議惟是皇上以天子之尊服制既絕不必御西角

門羣臣成服後不當素服朝參及上喪奠儀帝復諭毅
皇后事宜與累朝皇后不同無几筵之奉當即行祔廟
令皇后攝事於內殿言等議按禮卒哭乃行祔告蓋以
新主當入舊主當祧故預以告也此在常典則然非今
日義例毅皇后神主誠宜即祔太廟以妥神靈而祔告
之禮宜免因具上其儀制可嘉靖七年世宗皇后陳氏
崩禮部上喪祭儀帝疑過隆議再上帝自裁定概
從減殺欲五日釋服閣臣張璉等言夫婦之倫參

三綱而立人君乃綱常之主尤不可不慎左傳昭
公十五年六月乙丑周景王太子壽卒秋八月戊
寅王穆后崩叔向曰王一歲而有三年之喪二焉
蓋古禮父為子夫為妻皆服報服三年後世夫為
妻始制為齊衰杖期父母在則不杖喪服自期以
下諸侯絕然特為旁期言若妻喪本自三年報服
殺為期年則固未嘗絕者今皇上為后服期以日
易月僅十二日臣子為君母服三年以日易月僅

二十七日較諸古禮已至殺矣皇上宜服期十二日
臣子素服終二十七日不然則恩紀不明典禮有乖禮
臣方獻夫亦雜引儀禮喪服等篇反覆爭辨并三朝聖
諭所載仁宗皇后崩太宗哀服後仍復數月白衣冠故
事以證之帝言文皇后喪時上無聖母下有東宮從重
盡禮為宜今不敢不更其制已詹事霍韜言今百官遭
妻喪無服哀泣事之禮蓋禮喪內而不外陰不可當陽
也聖諭云素服十日倣輟朝之義於內廷行之則可若

對臨百官總理百幾履陽之位行中宮之服則不可百
官為皇后服衰為其母儀天下也禮父在為母杖不上
於堂尊父也於朝廷何獨不然臣請陛下元冠素服御
西角門十日即元冠元服御奉天門百官入左掖門則
烏紗帽素衣侍班退出公署及私室則仍素服白帽二
十七日若曰於禮猶有未愜則山林事畢而除帝從其
言尋定進冊謚儀禮部議先期帝袞冕告奉先殿崇先
殿致期帝常服御奉天門正副使常服百官淺淡色衣

黑角帶入班行禮如儀節冊至右順門內侍捧入正門
至几筵前置於案內贊贊就位上香宣冊官立宣訖復
置冊於案內侍持節由正門出以節授正副使報禮畢
正副使持節復命次日禮部謄黃頒示天下時中宮喪
禮自文皇后而後至是始再行永樂時典禮燬於火會
典所載皆畧乃斷自帝心著為令梓宮將葬帝親定諸
儀亦從減損以思善門逼近仁智殿命百官哭臨止一
日亦罷辭祖禮喪由左玉門出二十六年皇后方氏崩

即日發喪諭禮部皇后嘗救朕危其考元后喪禮行之
禮部定儀以第四日成服自後黑冠素服十日後易淺
色衣俱西角門視朝百官十日素服經帶自後烏紗帽
黑角帶素服通前二十七日帝常服於奉天門視朝百
官淺色衣鳴鐘鼓鳴鞭如常朔望不陞殿梓宮發引百
官始常服帝於奉先等殿行禮俱常服於几筵祭則服
其服服滿日命中官代祭從之尋諭皇妃列太子後非
禮其改正及葬部臣以舊儀請詔梓宮由中道行虞祭

如制用九數安元宮居左他日即配祀部臣復上儀注
改席殿曰行享殿又以孝潔皇后自發引至神主還京
將半載遇令節百官常服令孝烈皇后初十日發引十
五日即還事禮不同以諸臣服制請帝命隨喪往來者
仍制服祭畢烏紗帽素服入朝素冠素服辦事迎主仍
制服思善門外行安神禮更素冠素服從事先是帝命
孝烈居左而遷孝潔既而以孝潔久安不宜妄動罷不
行乃更命孝烈居右而虛其左以自待穆宗母杜氏三

十三年薨禮部言宜用成化中淑妃紀氏喪制且裕王
已成婚宜持服主喪送葬出城乃議輟朝五日裕王遵
孝慈錄斬哀三日欽遣大臣題主開塋掩壙祠謝后土
并用工部官送葬儀仗人數皆增於舊帝謂非禮之正
令酌考賢妃鄭氏例於是尚書歐陽德等復上儀注輟
朝二日不鳴鐘鼓帝復淺淡色衣奉天門視事百官淺
色衣烏紗帽黑角帶朝參明裕王主饋奠之事王卒妃
入宮青服哭盡哀四拜視殮成服後朝夕哭臨三日後

每日一奠通前二十七日而止仍於燕居盡斬哀三年之制冊謚焚黃日陳祭儀裕王詣靈前行禮喪出元武門裕王步送至京城門外路祭畢還宮帝謂焚黃乃制命非王可行仍如常儀禮部覆奏皇妃焚黃儀傳訛已久皆拜獻酒跪讀祝乃參用上尊謚之儀而未思賜謚為制命其祭文稱皇帝遣諭與上尊謚不同今奉旨以常禮從事當改議賜謚如賜祭禮讀祝宣冊皆平立不拜報可著為令穆宗皇后季氏裕邸元妃也先薨葬西

山隆慶元年加謚孝懿皇后親告世宗几筵御皇極門遣大臣持節捧冊寶詣陵園上之神宗母皇太后李氏萬曆四十二年崩帝諭禮部從優具儀帝哀服行奠祭禮穆廟皇妃中宮妃殯太子諸王公主以下皆成服百官詣慈寧宮門外哭臨命婦入宮門哭臨餘俱如大喪禮

興宗帝后陵寢洪武二十五年皇太子薨命禮部議喪禮侍郎張志等議曰喪禮父為長子服齊衰期年今皇

帝當以日易月復齊哀十二日祭畢釋之在內文武官
公署齋宿翌日素服入臨文華殿給衰麻服越三日成
服詣奉和門會哭明日素服行奉慰禮其當祭祀及送
葬者仍衰經以行在京停大小祀事及樂至復土日而
止停嫁娶六十日在外文武官易服於公署發哀次日
成服行禮停大小祀事及樂十三日停嫁娶三十日其
內外官致祭者帝令光祿寺供具百官惟致哀行禮建
文帝卽位追謚為興宗孝康皇帝所存陵號不傳元妃

常氏先興宗薨太祖素服輟朝三日中宮素服哀臨皇太子齊哀葬畢易常服皇孫斬哀祭奠則服之諸王公主服如制建文初追謚曰孝康皇后永樂初皆追削福王立南京復帝后故號

睿宗帝后陵寢在安陸州世宗入立追謚曰睿宗獻皇帝葺陵廟荐號曰顯陵既而希進之徒屢言獻皇帝梓宮宜改葬天壽山帝不聽嘉靖十七年帝母蔣太后崩禮部言歲除日大行皇太后服制二十七日已滿適遇

正旦請用黑冠淺淡服受朝疏未下帝諭大學士夏言
元旦元極殿拜天仍具祭服先期一日宜變服否禮部
請正旦拜天受朝及先一日俱青服孟春時享前三日
齋青服臣下同之餘仍孝貞皇太后喪禮例不從於是
定議歲除日變服元色吉衣元旦祭服於元極殿行告
祀禮具翼善冠黃袍御殿百官公服致詞鳴鐘鼓鳴鞭
奏堂上樂是時議南北遷祔久不決帝親詣承天及歸
乃定議梓宮南祔禮部上葬儀自常典外帝復增定太

廟辭謁承天門辭奠朝陽門遣奠題主後降神饗神及
梓宮登舟升岸等祭梓宮祭引帝哀服行諸禮如儀百
官步送朝陽門外奠獻使行遣奠禮至通州題主官復
命神主回京百官奉迎於門外帝哀服率皇后以下哭
迎午門內奉安於几筵殿梓宮所過河瀆江山神祇俱
牲醴致祭勲臣青服行禮梓宮升席殿先詣睿宗舊陵
奉遷於祔恩殿復奉梓宮至殿合葬於新寢

皇妃等喪葬洪武七年九月貴妃孫氏薨無子太祖命

吳王櫛主喪事服慈母服斬衰三年東宮諸王皆服期
由是作孝慈錄永樂中貴妃王氏薨輟朝五日御祭一
壇皇后皇妃皇太子各祭一壇親王共祭一壇公主共
祭一壇七七日期再期皆祭贈諡冊行焚黃禮開塋
域遣官祠后土發引前期辭靈祭壇與初喪同惟增六
尚司及內官內使各一壇啟奠祖奠遣奠各遣祭一壇
發引日百官送至路祭所皇親駙馬共一壇公侯伯文
武共一壇外命婦共一壇所過城門祭祀內門遣內官

外門遣太常寺官下葬遣奠遣祭一壇掩壙遣官祀后
土迎靈橋至享堂行安神禮遣祭一壇天順七年敬妃
劉氏薨輟朝五日帝服淺淡黃衣於奉天門視事百官
淺淡色衣烏紗帽黑角帶朝參冊文置靈柩前皇太子
以下迎三獻禮靈柩前儀仗內使女樂二十四入花襜
雪柳女隊子二十人女將軍十一人自初喪至期年辭
靈各於常祭外增祭一壇弘治十四年憲廟麗妃章氏
發引輟朝一日凡陪葬諸妃歲時俱享於殿內其別葬

金山諸處者各遣內官行禮嘉靖間始命併入諸陵從祭祫恩殿之兩旁以紅紙牌書曰某皇帝第幾妃之位祭畢焚之後改用木刻名號嘉靖十三年諭禮工二部世婦御妻皆用九數九妃同一墓共一享殿為定制皇太子及妃喪葬自洪武中懿文太子後至成化八年懷獻太子薨年甫三歲帝諭禮部禮宜從簡王府及文武官俱免進香帛禮部具儀上自發喪次日輟朝三日帝服翼善冠素服七日而除又三日御西角門視朝不

鳴鐘鼓祭用素食文武羣臣素服麻布經帶麻鞋布裹
紗帽詣思善門哭臨一日而除第四日素服朝西角門
奉慰在外王府井文武官素服舉哀二日而除嘉靖二
十八年莊敬太子薨禮部上喪禮帝曰天子絕期況十
五歲外方出三殤朕服非禮止輟朝十日百官如制成
服十二日而除詣停柩所行罷詣門哭臨奠遣戚臣行
禮萬厯四十七日二月皇太子才人王氏薨命視皇太
子妃郭氏例輟朝五日不鳴鐘鼓帝服淺淡色衣百官

青素服黑角帶朝參皇長孫主饋奠

諸王及妃公主喪奠諸儀洪武二十八年秦王棧薨詔
定喪禮禮部尚書任亨泰言孝宗制宜輟朝五日今遇
時享請暫輟一日皇帝及親王以下至郡主及靖江王
宮眷服制皆於魯王喪禮同皇太子服齊哀期亦以日
易月十二日而除素服期年從之定制親王喪輟朝三
日禮部奏遣官掌行喪奠禮翰林院撰祭文謚冊文壙
志文工部造銘旌遣官造墳欽天監官卜葬國子監監

生八名報訃各王府御祭一皇太后皇后東宮各一在京文武官各一自初喪至除服御祭凡十三壇封內文武祭一其服制王妃世子衆子及郡王郡主下至宮人斬衰三年封內文武官齊衰三日哭臨五日而除在城軍民素服五日郡王衆子郡主為凡及伯叔父齊衰期年郡王妃小功凡親王妃喪御祭一壇皇太子中宮東公宮主各祭一壇布政司委官開壙合葬繼妃次妃祭禮同其夫人則止御祭一壇但造壙祔葬郡王喪輟朝

一日行人司遣官掌行喪葬禮餘多與親王同無皇太后皇后祭郡王妃與親王妃同無公主祭合葬郡王繼妃次妃喪禮俱於正妃同凡世子喪御祭一東宮祭一遇七及百日下午葬期年除服御祭各一凡世孫喪禮如世子減七七及大祥祭凡鎮國將軍正間喪百日下午葬三祭奉國將軍以下御祭一初洪武九年五月晉王妃謝氏薨命議喪服之制侍講學士宋濂等議曰按唐制皇帝為皇妃等舉哀宋制皇帝為皇親舉哀今參酌唐

宋之制皇帝及中宮服大功諸妃皆服小功南昌妃服大功東宮公主親王等皆服小功晉王服齊衰期靖江王妃小功王妃服總麻輟朝三日既成服皇帝素服入喪次十五舉音百官奉慰皇帝出次釋服服常服制曰可其後王妃喪視此正統十三年定親王塋地五十畝房十五間郡王塋地三十畝房九間郡王子塋地二十畝房三間郡主縣主塋地十畝房三間天順二年禮部奏定親王以下依文武大臣例或王或妃先故者合

造其壙後葬者止令所在官司安葬繼妃則祔葬其旁
同一享堂成化八年二月忻王見治薨發引日帝不視
朝及葬輟朝一日十三年四川按察使彭韶言親王郡
王薨逝皆遣官致祭使臣絡繹人夫勞擾自後惟親王
如舊其郡王初喪禮官一致祭使臣本處官凡王親母
妃之喪俱遣內官致祭今宗婦衆多其地有鎮守太監
者宜遣行禮又王國塋葬夫婦同穴初造之時遣官監
修壙開合葬乞止命本處官司帝從禮部覆奏王妃祭

禮如舊餘依議行弘治十六年七月申王祐楷薨禮部
言前沂穆王薨未出府申王已出府而未之國擬依沂
穆參以在外親王例行之王妃葬地載於會典者明初
追封壽春等十王及妃墳在鳳陽府及妃祔葬鳳陽有
司歲時祭署陵戶南昌等五王及妃祔葬鳳陽皇陵有
司歲時祭祀皆與享懷獻世子以下諸王未之國者多
葬於西山歲時遣內官行禮永樂十五年正月永安公
主薨時初舉張燈宴遂罷之輒朝四日賜祭命有司治

喪葬二月太祖第八女福清公主薨輟朝三日定制凡
公主喪聞輟朝一日自初喪至大祥御祭凡十二壇下
葬輟朝一日儀視諸王稍殺喪制同惟各官不成服其
未下嫁葬西山歲時遣內官行禮

明史卷五十九

欽定四庫全書

明史卷六十

大學士張廷玉等奉 敕修

志第三十六

禮十四 凶禮三

謁祭陵廟

忌辰

受蕃國王訃奏儀

為王公大臣舉哀儀

臨王公大臣喪儀

中官為父祖喪儀

遣使臨弔儀

遣使冊贈王公大臣儀

賜祭葬

喪葬之禮

碑碣

賜諡

品官喪禮

士庶人喪禮

服紀

謁祭陵廟洪武元年三月遣官致祭仁祖陵二年加號英陵
禮部尚書崔亮請下太常行祭告禮博士孫吾與言山陵之
制莫備於漢初未有祭告之禮蓋廟號陵號不同廟號易大

行之號必上冊諡告之神明陵號則後嗣王所以識別先後而已願罷英陵祭告亮言漢光武加先陵曰昌宋太祖加高曾祖考亦曰欽康定安蓋尊祖考則尊其陵尊其陵則必以告禮緣人情告之是廷議皆是亮從之熙祖陵每歲正旦清明中元冬至及每月朔望本署官供祭行禮又即其地望祭德祖懿祖二年英陵後改稱皇陵多孟冬一祭俱署官行禮朔望中都留守司官行禮八年詔翰林院議陵寢朔望節序祭祀禮學士樂韶鳳等言漢諸廟寢園有便殿日祭於寢

月祭於廟時祭於便殿後漢都洛陽以關西諸陵久遠但四時用特牲祀每西幸即親詣歲正月祀郊廟畢以次上洛陽諸陵唐園陵之制皇祖以上陵皆朔望上食元日冬至寒食伏臘社各一祭皇考陵朔望及節祭日進食又薦新於諸陵永徽二年定獻陵朔望冬夏至伏臘清明社等節皆上食開元中敕獻昭乾定橋恭六陵朔望上食冬至寒食各設一祭宋每歲春秋仲月遣太常宗正卿朝諸陵我朝舊儀每歲元旦清明七月望十

月朔冬至日俱用太牢遣官致祭白塔二處則用少牢
中官行禮今擬如舊儀增夏至日用太牢其伏臘社每
月朔則用特羊祠祭祭署官行禮如節與朔望伏臘社
同日則用節禮從之十六年孝陵殿成命皇太子以牲
醴致祭清晨陳祭儀畢皇太子親王由東門入就殿中
拜位皆四拜皇太子少前三上香奠酒讀祝曰園陵始
營祭享之儀未具今禮殿既成奏安神位謹用祭告遂
行亞獻終獻禮皇太子以下皆四拜執事行禮皆內官

二十六年令車馬過陵及守陵官民入陵者百步外下馬違者以大不敬論建文初定孝陵每歲正旦孟冬忌辰聖節俱行香清明中元冬至俱祭祀勳舊大臣行禮文武官陪祀若親王之藩過京師者謁陵官員以公事至入城者謁陵出城者辭陵國有大事遣官祭告懿文太子陵在孝陵左四孟清明中元冬至歲暮及忌辰凡九祭永樂元年工部以泗州祖陵黑瓦為言帝命易以黃如皇陵制宣宗即位遣鄭王謁祭孝陵正統二年諭

天壽山陵寢剪伐樹木者重罪都察院榜禁錦衣衛官
校巡視工部欽天監官環山立界十年謁三陵諭百官
具淺色衣服如洪武永樂例南京司禮太監陳祖圭言
魏國公徐備每祭孝陵皆由紅券門直入至殿內行禮
僭妄宜改備言入由紅券門者所以重祖宗之祭尊皇
上之命出由小旁門者所以守臣下之分循守故事幾
及百年豈敢擅易下禮部議言長陵及太廟遣官致祭
所由之門與孝陵事體相同宜如舊從之弘治元年遣

內官監護鳳陽皇陵凡官員以公事經過者俱謁陵十
七年更裕陵神座初議以孝肅太皇太后附葬裕陵已
遣官分告諸陵及天壽后土而欽天監以為歲之殺在
北方向不利內官監亦謂英廟陵寢難以輕動遂議別
建廟奉安神主帝心未憚卒移英廟居中孝莊居左孝
肅附其右云正德間定長陵以下諸陵各設神官監并
衛及祠祭署凡清明中元冬至俱分遣駙馬都尉行禮
文武官陪祭忌辰及正旦孟冬聖節亦遣駙馬都尉行

禮親王之藩詣諸陵辭謁恭讓章皇后陵清明中元冬
至忌辰內官行禮西山景皇帝陵祭期如上儀賓行禮
初成祖易黃土山名天壽山嘉靖十年名祖陵曰基運
山皇陵曰翌聖山孝陵曰神烈山顯陵曰純德山及天
壽山並方澤從事所在有司祭告各陵山祇禮官因奏
神祇壇每年秋祭有鍾山天壽山之神今宜增基運等
山從之十四年諭禮部尚書夏言清明節既遣官上陵
內殿復祭似涉煩複言因言我朝祀典如特享時享祫

祭禘祭足應經義可為世法惟上陵及奉先殿多沿前
代故事上陵之祀每歲清明中元冬至凡三中元俗節
事本不經往因郊祀在歲首故冬至上陵蓋重一氣之
始伸報本之義今冬至既行大報配天之禮則陵事為
輕况有事南郊乃輟陪祀臣僚遠出山陵恐於尊祖配
天之誠未盡可罷冬至上陵而移中元於霜降惟清明
如舊蓋清明禮行於春所謂雨露既濡君子履之有休
惕之心者也霜降禮行於秋所謂霜露既降君子履之

有悽愴之心者也二節既遣官上陵則內殿之祭誠不
宜複遂著為令十五年諭言曰廟重於陵其禮嚴故廟
中一帝一后陵則二三后配葬今別建奉慈殿不若奉
主於陵為宜且梓宮配葬而主乃別置是近於黜之非
親之也乃遷孝肅孝穆孝惠三后神主於陵殿又諭言
曰三后神主稱皇太后太皇太后者乃子孫所奉尊稱
今既遷陵殿則名實不準言等議曰三后神主禮不祔
廟義當從祧遷奉陵殿深合典禮其稱皇太后太皇太

后者乃子孫所上尊號今已遷奉於陵則當從夫婦之義改題孝肅神主不用睿字孝穆孝惠神主俱不用純字則嫡庶有別而尊親併隆矣命如擬行又諭祭告長陵等七陵俱躬叩拜恭讓章皇后景皇帝陵亦展拜一次以慰追感之情十七年改陵殿曰祫恩殿門曰祫恩門又建成祖聖蹟亭于平臺山率從官行祭禮二十一年工部尚書顧璘請以帝所上顯陵聖製歌詩製為樂章享獻陵廟禮部言天壽山諸陵歲祀皆不用樂已而

承天府守備太監傅霖乞增顯陵歲暮之祭部議言諸陵皆無歲暮祀典詔並從部議隆慶二年帝詣天壽山春祭前一日告世宗几筵及奉先弘孝神霄殿駕至天壽山紅門降輿由左門入陞輿駐驛感思殿越二日質明行禮帝青袍乘板輿至長陵門外東降輿由殿左門入至拜位上香四拜至神御前獻帛獻爵訖復位亞獻終獻令執爵者代復四拜餘如常祭之儀降詣永陵行禮是日遣官六員青服分祭六陵至萬曆八年謁陵禮

如舊十一年復謁陵禮部言宜遵世宗彙憲酌分二日
以次展拜乃定長永昭三陵上香八拜親奠帛初獻六
陵二寢上香四拜其奠帛三獻俱執事官代十四年禮
部言諸妃奠金山諸處者嘉靖中俱配享各陵殿罷本
墳祭今世廟諸妃安厝西山者宜從其例至陵祭品物
九陵恭讓恭仁之陵止于酒果而越靖諸王及諸王妃
則又有牲果祝文及從其厚者蓋以九陵帝后歲暮已
禘祭於廟旬日內且復有孟春之享故元旦陵殿止用

酒果非儉也諸王諸妃則祫祭春祭皆不與元旦一祭
不宜從簡故用牲帛祝文非豐也特恭讓恭仁既不與
祫享于廟中又不設牲帛於陵帛是則禮文之缺宜增
所未備而諸王諸妃祝文尚仍安厝時所用宜改叙歲
時遣官之意則情順禮安報可凡山林規制有寶城長
林最大徑一百一丈八尺次永陵徑八十一丈各陵深
廣丈尺有差正前為明樓樓中立帝廟謚石碑下為靈
寢門惟永陵中為券門左右牆門各一樓明樓前為石

几筵又前為祿思殿祿思前殿惟長陵重簷九間左右
配殿各十五間永陵重簷七間配殿各九間諸陵俱殿
五間配殿五間門外神庫或一或二神厨宰牲亭有聖
蹟碑亭諸陵碑俱設門外率無字長陵迤南有總神道
有石橋有石像人物十八對擎天柱四石望柱二長陵
有神功聖德碑仁宗御撰在神道正南 紅門 外
石碑坊一門內有時步殿為車駕更衣之所永陵稍東
有感思殿為駐蹕之所殿東為神馬廐

忌辰洪武八年四月仁祖忌日太祖親詣皇陵致祭永樂元年禮部尚書李至剛等奏定高皇帝忌辰前二日帝服淺淡色衣御西角門視事不鳴鍾鼓不行賞罰不舉音樂屠宰百官淺淡色衣黑角帶朝參之至日親祀於奏先殿仍率百官詣孝陵致祭高皇后忌辰如之宣德四年令凡遇忌辰通政司禮科兵馬司勿引囚奏事五年敕百官朝參輟奏事儀英宗即位名禮臣及翰林院議忌辰禮大學士楊士奇楊榮學士楊溥議每歲高

廟帝后文廟帝后仁宗忌辰服淺深色服不鳴鐘鼓於奉天門視事宣宗忌辰小祥之日於西角門視事從之
弘治十四年令凡遇忌辰朝參官不得服紵絲紗羅衣
景皇帝恭讓皇后忌辰遇節令服青絲花樣宣宗忌辰
遇祭祀服紅十六年八月吏部尚書馮文升言宣德間
仁宗忌辰諸司悉免奏事自太宗至仁宗生忌俱輟朝
其後不知何時仁宗忌辰依前奏事惟太宗至憲宗忌
辰百官淺淡色服黑色帶朝廷亦出視朝鳴鐘鼓奏事

臣思自仁至憲世有遠近服有隆殺請自仁宗忌辰英
宗生忌日視朝鳴鐘鼓若遇孝宗及孝穆皇太后忌日
不視朝著淺淡服進御膳不遇他事或遵宣宗時例自
太宗至憲宗生忌俱輟朝一日憲宗孝穆忌日如臣所
擬下于禮部議部臣言經傳所載忌日為親死之日則
死日為忌非謂生辰也其曰忌日不用不以此日為他
事也曰忌日不樂是不可舉吉事也此日當專意哀思
父母餘事皆不舉但先朝事例迄今見行未敢更易帝

乃酌定以淺淡服色視事嘉靖七年令忌辰只祭本位
十八年令高廟帝后忌辰祭于景神列聖之帝后忌辰
祭于永思殿二十四年令仍祭於奉先殿

乘輿受蕃國王訃奏儀凡蕃國王薨使者訃奏至于西
華門內壬地設御幄皇帝素服乘輿詣幄太常卿奏某
國世子遣陪臣某官某奏某國王臣某薨承制官至使
者前宣制曰皇帝致問爾某國王某得何疾而逝使者
答故其儀大畧如臨王公大臣喪儀但不舉哀凡塞外

都督等官訃至永樂間遣官賫香鈔諭祭後定例因其
奏請給與表裏祭文令攜歸自祭來京病故者遣官諭
祭或賜棺賜葬後定年終類奏遣官祭之若在邊歿于
戰陣者不拘此例凡外國使臣病故者令所在官司賜
棺及祭或欲歸葬者聽

乘輿為王公大臣舉哀儀洪武二年開平王常遇春卒
於軍訃至禮官請如宋太宗為趙普舉哀故事遂定制
凡王公薨訃報太常司示百官于西華門內壬地設御

幄陳御座置素褥設訃者位於前設百官陪哭位東西
向奉慰位於訃者位北北向贊禮二人位於訃者位之
北引訃者二人位於贊禮之南引百官四人位於陪位
之北皆東西向其日備儀仗於奉天門迎駕皇帝素服
乘輿詣幄樂陳於幄之南不作太常卿奏某官來訃某
年月日臣某官以某疾薨請舉哀皇帝哭百官皆哭太
常卿奏止哭百官奉慰訖分班立訃者四拜退太常卿
奏禮畢乘輿還宮百官出東宮為王公舉哀儀同但設

幄於東宮西門外陪哭者皆東宮屬

乘輿臨王公大臣喪儀凡王公大臣訃奏太史監擇皇
帝臨喪日期拱衛司設大次於喪家大門外設御座於
正廳中有司設百官次於大次之左右侍儀司設百官
陪立位於廳前左右引禮四人位於百官之北東西向
設喪主以下拜位於廳前主婦以下哭位於殯北幔中
其日鑿駕至大次降輅升輿入易素服百官皆易服先
入就廳前分班侍立御輿出次喪主以下免經去杖哀

服出迎於大門外望見乘輿止哭再拜入於門內之西
乘輿入門將軍四人前導四人後從入至正廳降輿升
詣靈座前百官班於後皇帝哭百官皆哭太常卿奏止
哭三上香三祭酒出至正廳御座主喪以下皆跪宣制
訖皆再拜退立于廳西太常卿奏禮畢以下皆跪宣制
訖皆再拜退立于廳西太常卿奏禮畢皇帝升輿出就
大次易服御輿出喪主以下詣前再拜退皇帝降輿升
輅喪主杖哭而入諸儀衛贊唱大畧如常其公侯卒葬

輟朝禮洪武二十三年定凡公侯卒於家者聞喪輟朝三日下葬一日卒於外者聞喪一日柩至京三日下葬仍一日凡輟朝之日不鳴鐘鼓各官淺淡色衣服參初制都督至督指揮卒輟朝二日永樂後更定惟公侯駙馬伯及一品官輟朝一日

中宮為父祖喪儀凡中宮父母薨訃報太常寺轉報內使監前期設薦於別殿東壁下為皇后舉哀位及內命婦以下哭位皇后出詣別殿內使監令奏考某官以某

月某日薨母則云妣某夫人祖考妣同皇后哭內命婦
以下皆哭盡哀皇后問故又哭盡哀乃素服內命婦皆
素服止哭還宮內使監令奏聞得旨皇后奔喪喪家設
薦席於喪寢之東從臨內命婦哭位於其下主喪以下
哭位於喪寢之西主婦以下哭位於喪寢之北幔下至
日內使監進聖車備儀仗導引皇后素服出宮升輿三
面白布行帷至閤外降輿升聖車至喪家大門內降車
哭入仍以行帷圍護從臨者皆哭入喪主以下降詣西

階下立哭皇后升自東階進至尸東憑尸哭從臨者皆
哭喪主升自西階俱哭於柩西皇后至哭位內使監令
跪請止哭應奉慰者詣皇后前奉慰如常禮如皇后候
成服則從臨命婦應還者先還如本日未即奔喪則日
晡復哭於別殿尚服製皇后齋衰及從臨命婦孝服俟
喪家成服日進之詣靈前再拜上香復位再拜如為諸
王外戚舉哀仍於別殿南向不薦設位

遣使臨弔儀太常司奉旨遣弔前期設宣制位於喪家

正廳之北南向喪主受弔位於南北向婦人立哭位於殯北幕下其日使者至喪主去杖免經衰服止哭出迎於中門外復先入就廳前拜位內外止哭使者入就位稱有制喪主以下再拜跪宣制曰皇考聞某官薨遣臣某弔喪主以下復再拜禮畢內外皆哭使者出喪主至中門外拜送杖哭而入宮使則稱有令至遣使賻贈及致奠其儀節亦相倣云賻贈之典一品米六十石麻布六十匹二品以五三品四品以四五品六品以三公侯

則以百永樂後定制公侯駙馬伯皆取上裁凡陣亡者
全支邊遠守禦出征及出海運糧病故半支其遣百官
會王公大臣喪儀前期有司於喪家設位次其日百官
應會弔者素服立喪主以下就東階哭位主婦以下就
殯北哭位百官入就殯前位哭主喪主婦以下皆哭止
哭再拜主喪以下答拜班首詣喪主前展慰畢百官出
喪主拜送杖哭而入會葬儀同

遣使冊贈王公大臣儀前期禮部奏請製冊翰林院取

旨製文中書省禮部奏請某官為使其日祠祭司設龍亭香亭於午門前正中執事於受冊者家設宣制官位於正廳之東北南向喪主代受冊命者位於廳前北向禮部官封冊文以盂匝盛之黃袂裏置龍亭中儀仗鼓樂前導至其家代受冊者出迎於大門外執事舁龍亭置廳上正中使者入立於東北代受冊者就拜位再拜使者稍前稱有制代受冊者跪宣制曰皇帝遣臣某冊贈故某官某為某勲某爵宣訖代受冊者復再拜使者

取冊授之代受冊者捧置靈座前使者出代受冊者送
至大門外如不用冊者吏部用誥命喪家以冊文錄黃
設祭儀於靈前代受冊者再拜執事者展黃立讀於左
喪主以下皆再拜焚黃

賜祭葬洪武十四年九月衍聖公孔希學卒遣官致祭
其後羣臣祭葬皆有定制太祖諭祭羣臣文多出御筆
嘉靖中世宗為禮部尚書席書兵部尚書李承勛親製
祭文皆特典非常制也隆慶元年十二月禮部議上卹

典條例凡官員祭葬有無隆殺之等悉遵會典其特恩如侍從必日侍講讀軍功必躬履行陣東宮官必出閣講授有勞者據嘉靖中事例祭葬加一等無祭者與祭一壇無葬者給半葬半葬者給全葬講讀官五品本身有祭四品及父母三品及妻軍功四品得祭葬三品未滿及父母講讀年久啟沃功多軍旅身殲勲勞茂著者恩卹加厚臨期請旨會典凡一品官祭九壇父母妻加祭或二壇一壇或妻止一壇者恩難預擬遇有陳乞酌

擬上請二品二壇加東宮三少或兼大學士贈一品者
至四壇父母妻俱一壇致仕加三品者加一壇加太子
太保者加三壇妻未封夫人者不祭三品祭葬在任致
仕俱一壇兼學士贈尚書者二壇未及考滿病故者一
壇減半造葬悉如舊例四五品官不得重封故四品官
由六七品陞者父母有祭由五品陞者以例不重封遂
不得祭一壇四品以上官本身及父母雖止授五品封
亦與祭一壇四品以上官本身及父母恩典必由考滿

而後得然有二品三品共歷四五年父母未授三品封終不得霑一祭者宜並叙年資二品三品共歷三年以上者雖未考三品滿本身及父母俱與三品祭葬三品四品共歷三年以上者雖未考四品滿本身用三品未考滿例祭一壇半葬父母祭一壇凡被劾間住者雖遇覃恩復致仕仍不給祭葬勲臣祭葬皇親出自上裁駙馬都尉祭十五壇公侯伯在內掌府事坐營在外總兵有殊勲加太子太保以上者遵會典公侯十六壇伯十

五壇掌府坐營總兵有勲勞者七壇掌府坐營年勞者
五壇掌府坐營而政蹟未著者四壇管事而被劾勘明
間住者二壇被劾未經勘實者一壇勘實罪重者并本
爵應得祭葬者削又正德間公侯伯本祭俱三壇嘉靖
間二壇今增嘉靖例以復會典之舊武臣祭葬遵正德
嘉靖例都督同知僉事錦衣衛指揮祭三壇署都督同
知僉事一壇餘推類行之帝從其議萬曆六年更定凡
致仕養病終聽用等官祭葬俱與現任官同二十二年

續定被劾自陳致仕官有日久論定原無可議者仍給祭葬父母妻視本身為差等

喪葬之制洪武五年定凡襲衣三品以上三四品五品二六品以下一飯含五品以上飯稷含珠九品以上飯梁含小珠銘旌降帛廣一幅四品以上長九尺六品以上八尺九品以上七尺斂衣品官朝服一襲常服十襲衾十番靈座設於柩前用帛絹結魂帛以依神棺槨品官棺用油杉朱漆槨用土杉牆翼公侯六三品以上四

五品以上二明器公侯九十事一品二品八十事三品
四十七事五品六十事六品七品八品三十事九品
二十事引者引車之紼也披者以纁為之繫於輻車四
柱在旁執之以備傾覆者也鐸者以銅為之所以節挽
歌者公侯四引六披左右各八鐸一品二品三引四披
左右各六鐸三品四品二引三披左右各四鐸五品以
下二引二披左右各二鐸羽旂竿長九尺五品以上一
人執之以引柅六品以下不用功布品官用之長三尺

方相四品以上四目七品以上兩目八品以下不用柳
車上用竹格以綵結之旁施帷幔四角重流蘇誌石二
片品官皆用之其一為蓋書某官之墓其一為底書姓
名鄉里三代生年卒葬月日及子孫葬地婦人則隨夫
與子孫封贈二石相向鐵束埋墓中祭物四品以上羊
豕九品以上豕初洪武二年勅葬開平王常遇春於鍾
山之陰給明器九十事納之墓中鉦二鼓四紅旗拂子
各二紅羅蓋鞍籠各一弓二箭三竈釜火爐各一俱以

木為之水罐甲頭匾臺蓋杓壺瓶酒甕唾壺水盆香爐
各一燭臺二香盒香匙各一香筋二香匙筋瓶茶鍾茶
盞各一筋二匙二匙筋瓶一椀二櫛十二橐二俱以錫
造金裹之班劍牙仗各一金裹五爪骨朶戟響節各二
交椅脚踏馬杓各一誕馬六槍劍斧弩食桌牀屏風柱
杖箱交牀香桌各一撓二俱以木為之樂工十六執儀
仗二十四控士六女使十青龍白虎朱雀元武神四門
神二武士十并以木造各高一丈雜物翼六壁一筐筭

揮梳衿盤各一苞二宵二糧漿瓶二油瓶一紗厨暖帳
各一束帛青三段纁二段每段長一丈八尺後定制公
侯九十事者准此行之餘以次減殺

碑碣明初文武大臣薨逝例請於上命翰林官製文立
神道碑惟太祖時中山王徐達成祖時榮國公姚廣孝
及弘治中昌國公張巒治先塋皆出御筆其制自洪武
三年定五品以上用龜碑趺螭首六品以下用碣方趺
圓首五年復詳定其制功臣歿後封王螭首高三尺二

寸碑身高九尺廣三尺六寸龜趺高三尺八寸一品螭首二品麟鳳蓋三品天祿辟邪蓋四品至七品方趺首視功臣及臣封王者遞殺二寸至一尺八寸止碑身遞殺五寸至五尺五寸止其廣遞殺二寸至二尺二寸止跌遞殺二寸至二尺四寸止墳塋之制亦洪武三年定一品塋地周圍九十步墳高一丈八尺二品八十步高一丈四尺三品七十步高一丈二尺以上石獸各六四品四十步七品以下二十步高六尺五年重定功臣歿

後封王塋地周圍一百步墳高二丈四圍墳牆高一丈
石人四文武各二石虎羊馬石望柱各二一品至六品
塋地如舊制七品加十步一品墳高一丈八尺二品至
七品遞殺二尺一品墳牆高九尺二品至四品遞殺一
尺五品四尺一品二品石人二文武各一虎羊馬望石
各二三品四品無石人五品無石虎六品以下無當太
祖時盱眙楊王墳置守戶二百一十宿州徐王墳置墳
戶九十三滁州滁陽王墳亦置墳戶四年又賜功臣李

善長徐達常茂馮勝墳戶百五十鄧愈唐勝宗陸仲亨
華雲龍顧時陳德耿炳文吳禎孫恪郭興墳戶百成化
十五年南京禮部言常遇春李文忠等十四人勲臣墳
墓俱在南京城外文忠曾孫萼等以歲久頽壞為言請
命工修治帝可其奏且令無子者復於墓旁一人守護
之

賜諡親王例用一字郡王二字文武大臣同與否自上
裁若官品未高而侍從有勞或以死勤事者特賜諡非

常例洪武初有應得諡者禮部請旨令禮部行翰林院擬奏弘治十五年定制凡親王薨行撫按郡王病故行本府親王及承奉長史覈勘以奏乃議諡文武大臣請諡禮部取自行吏兵部考實蹟禮部定三等行业俱優者為上頗可者為中行實無取者為下送翰林院擬諡有應諡而未得者撫按科道官以聞按明初舊制諡法自十七字至一字各有等差然終高帝世文臣未嘗得諡武臣非贈侯伯不可得魯秦二王曰荒曰愍至建文

諡王禕成祖諡胡廣文臣始有諡迨世宗則濫及方士
且加四字矣定例三品得諡詞臣諡文然亦有得諡不
止三品諡文不專詞臣者或以勲勞或以節義或以望
實破格崇褒用示激勸其冒濫者亦間有之萬厯元年
禮臣言大臣應得諡者宜廣詢嚴覈應諡而未請者不
拘遠近撫按科道舉奏酌議補咨十二年禮臣言大臣
諡號必公論允服毫無瑕疵者具請上裁如行業平常
即官品雖崇不得概予帝皆從之三十二年禮部侍郎

郭正域請嚴諡典議奪者四人許論黃光昇呂本范謙
應奪而改者一人陳瓚補者七人伍文定吳悌魯穆楊
繼宗鄒智楊源陳有年閻臣沈一貫朱賡力庇呂本不
從其議未幾御史張邦俊請以呂柟從祀孔廟而論應
補諡者雍泰魏學曾等十四人部議久之共彙題先後
七十四人留中不發天啟元年始降旨俞允又增續請
者十人而邦俊原請九人不與正域所請伍文定等亦
至是始定凡八十四人其官卑得諡者鄒智劉臺魏良

弼周天佐楊允繩沈鍊楊源黃鞏楊慎周怡莊朶馮應
京皆以直諫孟秋張元忬曹端賀欽陳茂烈馬理陶望
齡皆以學行張銓以忠義李夢陽以文章魯穆楊繼宗
張朝端朱冠傅新德張允濟皆以清節楊慎之文憲莊
朶之文節則又兼論文學云三年禮部尚書林堯俞言
諡典五年一舉自萬曆四十五年至今蒙恤而未諡者
九卿臺省會議與臣部酌議帝可之然是時遲速無定
六年禮科給事中彭汝南言耳目近則覩記真宜勿逾

五年之限又謂三品以上為當予諡而建文諸臣之忠義陶安等之叅帷幄葉琛等之殉行間皆宜補諡事下禮部以建文諸臣未易輕擬不果行至福王時始從工科給事中李清言追謚開國功臣李善長等十四人正德諫臣蔣欽等十四人天啟慘死諸臣左光斗等九人而建文帝之弟允熲允煙允熙子文奎亦皆因清疏追補

品官喪禮載在集禮會典者本之儀禮士喪稽諸唐典